

Concierto Dominical un éxito rotundo!

Publico a keda encanta cu variacion y calidad musical

Diadomingo ultimo den un French Steakhouse completamente yen, a tuma lugar e Concierto Dominical cu ta wordo presenta tur ultimo Diadomingo di luna. Manera cu ya caba Klip Klap a comenta, for di awor en adelante, e hoben cantante Edjean Semeleer ta esun encarga cu organisacion di e concierto aki, ya cu Sra. Joyce Pereira a dicidi di pasa e responsabilidad over, despues di hopi aña exitoso di a fungi como animadora y organisador masha stima di e evento aki.

E mainta di Diadomingo ultimo a cuminsa cu presentacion di un quarteto di musiconan hoben, bao direccion di e maestro Johnny Croes.

Despues a sigui mas o menos 45 minuut di musica bolero cu a cay den masha bon tera serca tur presente. Efraim Antonio, Tico Quilotte, Faritah Luidens y Harlan Venner a deleita tur presente cu un tremendo repertorio. Nos a nota cu e publico presente a disfruta lo maximo di e presentacion di e cantantenan aki.

Despues di e rato di bolero aki, a sigui presentacion di e “SMRW Ensemble”, cu ta un ensemble di alumnonan y maestronan di Skol di Musica Rufo Wever, bao direccion di Johnny Croes.

E presentacion di e ensemble aki tabata asina sublime, cu na final di nan presentacion, e publico a duna nan un ovacion bon mereci y a keda grita pa mas.

Comentarionan masha positivo por a wordo scucha for di e publico y e organisadornan a te hasta haya hopi peticion pa inclui e grupo aki un bes mas den futuro conciertoan.

Pa termina e mainta di concierto, a toca turno na nos orguyo Sharon Rose pa deleita tur presente cu su piesanan musical y su tremendo voz. Sharon a duna tur hende un sabor chikito di loke lo

ta su dobel cd cu e lo lansa pronto riba mercado como celebracion di su 45 aña den e mundo di entretenimento. Esaki tabata otro presentacion fabuloso di un di nos artistanan local. Sharon no a solamente canta, pero a interactua masha hopi mes cu e publico presente. Hecho cutabata hopi di aprecia. E maestro di ceremonia di e concierto aki tabata Edjean mes cu a haci e trabao aki di un forma cu e publico a keda encanta cu su animacion. Na final, ningun hende tabata kier pa e concierto caba, sin cu Edjean mes interpreta por lo menos un cancion.

Pues el a hay’e ta complace cu su publico y a a dicidi di canta “Abo so”, improvisa, ya cu nos a nota cu e mes no a planea pa canta, y mirando tambe cu nos tata di cultura Sr. Padu Lampe tabata tey presente. Klip Klap tambe a forma parti di e publico ya cu esaki tabata e prome Concierto Dominical cu Edjean tin encargo di dje y nos kier a mira con tur cos lo a wordo hinca den otro. Nos tin di remarca cu nos no a duda ningun momento den capacidad di Edjean.

Ya cu el a demostra na varios ocasion cu e ta un persona determina y sumamente exitoso den tur trabao cu e desplega. Pues na e hoben aki, cu a demostra di no ta solamente un tremendo cantante, pero di tambe por planea, produci y dirigi proyectonan den e direccion di exito constante, nos tin cu duna un pabien grandi.

Tambe nos tin di felicita henter e organisacion y fundacion cu ta encarga cu e concierto dominical aki

cu ta sirbi como estimulo pa tur artista local. E ta un forma sumamente positivo pa expone talento, pero tambe pa e publico disfruta di e talento artistico y apoya loke ta di nos. Por ultimo, nos tin di manda un pabien grandi y palabranan di exito na tur e artistanan cu a presenta Diadomingo ultimo.

Ta di aprecia cu tur hende involvi ta hasi esaki for di curazon, sin ningun interes financiero. Boso presentacion excepcional ta digno di apoyo y sosten di boso publico. Boso talento unico y empeno ta sirbi como ehempel pa hopi otro, pero como

ehempel especialmente pa nos hobennan. E proximo concierto dominical lo ta Diadomingo dia 28 di Juni. Nos lo tey presente sigur un biaha mas pa disfruta di dos ora largo di concierto. Den e siguiente simannan Klip Klap lo informa bo mas di e proyecto fantastico aki.